



Martina Summermatter-Valier, Hinterkappelen / Camischolas

1941 - 2002

Tgi che ha enconuschiu Martina sa buca capir che sia veta terrestra ei già ida a fin ils 3 d'uost 2002.

Sco tierz affon da Giachen Martin e Maria Luzia Valier-Cavegn ei Martina naschida a Camischolas ils 20 d'octobre 1941. Suenter ella ein aunc 6 fargliuns naschi. Sco ina dallas feglias «grondas» ha ella già baul stuiu surprender responsabludad cun pertgirar ses fargliuns giuvens e quita ha ella giu da tut ses fargliuns entochen il davos di.

Martina era ina amicabla, sensibla e survetscheivla persunalitat; ina persuna cun in grond sentiment per giustia e da bien cor. Ella percursorcheva caussas ch'autra glieud ha mai sentiu. Dad ella sezza ha ella adina pretendiu fetg bia.

Igl onn 1969 eis ella maridada cun Heini Summermatter e secasada a Hinterkappelen sper Berna. Entras in tragic accident ha ella piars igl onn 1976 siu fegl giuven. Suenter quella frida ha la depression engrevegiau ella aunc dapli. Valerusamein ha ella empuruau da cumbatter la maligna malsogna. Ed era sia famiglia ha adina susteniu ella.

Malgrad quei destin fuva ella in dunna sportiva, possedeva biars talents ed era ina persuna fetg creativa. Sia hospitalitat era exemplarica. Ella sesenteva era bein entuorn cuntenta e legra glieud. Era sch'ins entupava buc'aschi savens ella a Camischolas, haveva ella buns contacts a Tujetsch. Ella persequitava tut quei che succedeva ella Val e susteneva ferventamein il lungatg mumma. Las cuntradas muntagnardas e la natira gudeva ella specialmein.

Nus capin buca sia decisiun. Denton acceptar stuein nus ella e leutier constatar che nies agid ei limitaus da gidar ils carstgauns en da quellas situaziuns.

Martina ha dau a nus bia carezia, per la quala nus engraziein ad ella. Per tut quels che stevan fetg datier dad ella eis ei grev da viver vinavon senza ella. Biars han piars ina sincera amitga ed ella maunca a nus tut. Surtut eis ei era necessari da buca mo patertgar sur da quei che nus havein piars mobein da quei ch'eis stau schenghegiau a nus.

Cara Martina en nos cors ed en nos patratgs vegnas Ti denton a viver vinavòn. Stai bein.

Tiu frar Tumaisch